

金華子雜編
中朝故事



金華子雜編

叢書集成初編所選函海
及讀畫齋叢書皆收有此
書函海無周廣業校注故
據讀畫齋本排印

叢書集成初編

金華子雜編（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米 三十二分之一
統一書號：一七〇一八·一五一

自序

金華子者。河南劉生。少慕赤松子兄弟。能釋羈鞅於放牧閒。讀其書。想其人。恍若遊於金華之境。因自號焉。生自童蒙歲。便解愛人博學。髫髻無髻。而無所成名。凡爲文章。略知宗旨。最嗜吟咏。而所得亦不出流輩。年逾壯室。方莅官於畿甸。繼宰二邑。其換二十餘寒暑。唯知趑趄畏慎。不能磊落經濟。罷秩歸京。得留綴班。家貧。在闕三四年。甚窘困。稍暇。猶綴吟不倦。縱情任興。一聯一句。亦時有合於清奇。顧於食玉燃桂。不無撓懷。纔緩紆斯須。則嘯傲自若。或遇盛友良會。聞人語話。及興亡理亂。猶耳聰意悅。未嘗不周旋觀察。冀或湊會警戒。庶幾助於理道者。必慷慨反覆。至於逾晷不息。時皇上憂勤大寶。宵衣旰食。致治之切。無愧前代。命有司張皇公道。掄擇材雋。科第取士。鬱然復古。時有以春闈策問。舉子對義見示者。視強國富民之論。古今得失之理。則愧惕雀息。往往汗流。何者。以坐遇明盛時。而抱名稱不聞於世。何疾復甚於斯矣。因念爲童時。侍立長者左右。或於冬宵漏永。秋階月瑩。尊年省睡。率皆話舊時經由。多至深夜不寐。始則承平事實。爰及亂離。於故基跡。或歎或泣。悽咽僕隸。自念髫髻之後。甚能記聽。今雖稚齒變老耄。忘失憶。十可一二。猶存乎心耳。併成人遊宦之後。其聞耳目諳詳。公私變易。知聞傳載。可繫鉛槧者。漸恐年代浸遠。知者已疎。更積新沈故。遺絕堪惜。宜編序者。卽隨而釋之云爾。文林郎大理司直臣劉崇遠撰。

金華子雜編卷上

南唐劉崇遠撰

海寧周廣業校注

我唐烈祖高皇帝。睿哲神明。順天膺運。相翬禍浹。有仍之慶。始隆哀莽毒飮。銅馬之尊。是顯堯儲復正。文廟重新。漉沈海之斷綸。卻成萬目。撥伏灰之餘簡。在序九流。宗周而一仁風。依漢而雜霸道。澆漓頓革。習尚無虛。遂使武必韜鈴。不空弓馬。文先政理。乃播風騷。由是勳伐子孫。知弓裘之可重。閭閻童稚。識詩書之有望。不有所廢。其何以興。是知楊氏飭弊於前。乃自弊也。烈祖聿興於後。固天興乎。始天祐開。江表多故。泊及寧帖。人尚苟安。稽古之談。幾乎絕侶。橫經之席。蔑爾無聞。及高皇初收金陵。首興遺教。懸金爲購。填典職吏而寫史籍。聞有藏書者。雖寒賤必優辭以假之。或有贊獻者。雖淺近必豐厚以答之。時有以學王右軍書一軸來獻。因償十餘萬。繪帛副焉。由是六經臻備。諸史條集。古書名畫。輻湊絳帷。俊傑通儒。不遠千里而家至戶到。咸慕置書。經籍道開。文武並駕。暨昇元受命。王業赫然。稱明文武。莫我跂及。豈不以經營之大基有素乎。

王師範鎮青州。以其祖父版籍舊地。凡本縣令新到。必備儀注。躬往投刺。縣令畏懼出迎。不許之。師範令二三客將。挾縣令坐於廳上。命執事通曰。百姓節度使王某。參拜於庭中而出。縣令惶惑。步隨至府謝罪。加遜而遣之。從事多諫其非。宜請不行。師範曰。以某之見則不然。將所以荷國恩而敬念先世。示子孫不

